

La dretgira administrativa refusa ils recurs cunter la fusiun d'Arosa

(cc) Cun satisfacziun ha la regenza prendì enconuschientscha dal fatg che la dretgira administrativa dal chantun Grischun ha refusà cun la sentenza dals 3 da settember 2013 il recurs costituziunal ed il recurs cunter il dretg da votar ch'èn vegnids inoltrads cunter la fusiun d'Arosa, Calfreisen, Castiel, Langwies, Lüen, Molinis, Peist e St. Peter-Pagig a la vischnanca d'Arosa.

Object dal recurs

Ils recurrents han contestà particularmain ch'ina radunanza communal constitutiva haja – suenter ch'il contract da fusiun è vegnì acceptà – votà davart la costituziun communal da la nova vischnanca d'Arosa. Tenor lur opiniun avess la costituziun communal stui vegnir approvada da mintga singula vischnanca. La disposiziun dal contract da fusiun che cuntegna la procedura respectiva e ch'è vegnida approvada da la regenza han ils recurrents resguardà sco cuntravenziun cunter la costituziun e cunter la lescha. Els han pretendì che mintga singula vischnanca haja da votar – ultra davart l'approvaziun dal contract da fusiun – er anc davart l'approvaziun da la costituziun. Pervia dal modus da votaziun applitgà sajan las votantas ed ils votants da las vischnancas pitschnas vegnids maiorisads da las votantas e dals votants d'Arosa sco vischnanca la pli gronda.

Cuntegn da la sentenza

La dretgira administrativa ha constatà che la procedura grischuna da fusiun na cuntrafetschia ni al dretg costituziunal ni al dretg chantunal. La libertad d'agir ch'il legislatur dettia a las vischnancas concernent la procedura prendia resguard da l'autonomia communal che ha ina gronda impurtanza en il Grischun. Las votantas ed ils votants hajan gi' occasiun avunda avant la votaziun da fusiun da sa far in maletg cler da la nova vischnanca futura. Tenor l'opiniun da la dretgira administrativa è ultra da quai d'impurtanza centrala che la protecciun da las minoritads saja vegnida resguardada adequatamain.

Impurtanza da la sentenza

Igl è stà l'emprima giada che la procedura grischuna da fusiun è stada l'object d'ina procedura giudiziala. Cun satisfacziun prenda la regenza enconuschientscha dal fatg che la sentenza na lascha nagins dubis vi da la legalitad da la procedura da fusiun che vegn applitgada dapi decennis. In basegn d'agir legislativ en quest connex n'è pia betg avant maun. En vista a l'impurtanza democratica ed a l'impurtanza da las dumondas giuridicas che sa tschentan en connex cun la fusiun contestada ha la dretgira desistì excepziunalmain d'adossar ils custs da dretgira als recurrents perdents.

La sentenza n'ha anc betg vigur legal; cunter ella poi vegnir recurrì tar il tribunal federal entaifer 30 dis.